

四庫全書

集部

欽定四庫全書

集部

風雅翼卷三

詳校官中書_臣丁榮祚

助教_臣常循覆勘

總校官知縣_臣繆琪

校對官編修_臣勵守謙

謄錄監生_臣邵敬修

欽定四庫全書

風雅翼卷三

元 劉履 編

選詩補註三

魏詩二

嵇康字叔夜諱郡錕人身長七尺八寸土木形骸
不自藻飾人以為龍章鳳姿好言老莊而尚奇任
俠寓居山陽與阮籍山濤向秀籍兄子咸王戎劉

伶相友善號竹林七賢初居貧鍛以自給與魏宗
室婚拜中散大夫山濤為吏部舉康自代康荅書
拒絕自言不堪流俗非薄湯武大將軍司馬昭聞
之而怒景元三年以鍾會譖殺之臨刑自若援琴
而鼓

贈秀才入軍三首

四言

秀才李善引本集作兄公穆又按劉義慶集
林公穆名熹舉秀才張銑曰康之從弟未知

何據

良馬既閑麗服有暉左攬繁弱右接

測洽反

忘歸風馳電

逝躡景

古影字通

追飛凌厲中原顧盼生姿攜我好仇

叶強於反

載我輕車南陵長阜北厲清渠仰落驚鴻俯引淵魚盤

于游田其樂只

音且子餘止反

賦也閑調習也麗服謂戎服鮮麗也繁弱弓名忘歸

矢名劉向新序云楚王載繁弱之弓忘歸之矢接與

挿同亦通作捷陳思王七啟云捷忘歸之矢凌厲承

上二句而言蓋有超縱橫行之態生姿猶孟子所謂
生色言其意氣自得見於顏面也仇匹載乘也大陸
曰阜寨衣涉水曰厲渠河渠引猶掣也盤樂田獵也
只且語助聲 此詩蓋叔夜於秀才從戎後所寄贈
故首述其軍中驍勇之情及盤游漁畋之樂也

息徒蘭圃秣馬華山

叶輪
旃反

流磻

音波

平臯垂綸長川目送

歸鴻手揮五弦俯仰自得游心太玄嘉彼釣叟得魚忘

筌郢人逝矣誰與盡言

叶倪
堅反

賦也徒軍衆也秣飼也華山蓋借用歸馬華山之意以石為鏃曰礮流礮猶言流矢臯李奇漢書註云水邊淤地蓋今江岸漲沙地也綸釣緇也太玄謂老莊之道筌取魚竹器得魚忘筌及郢人事並見莊子書此言秀才從軍多暇既無事於戰鬪惟以弋釣自娛或目飛鴻或彈五弦而俯仰之間游心道妙如彼釣叟得魚而忘筌其自得如此固可嘉矣然在軍旅之中誰可與論此者正猶莊子之意既無郢人之質

則匠石雖有運斤斲鼻之巧而無所施也

浩浩洪流帶我邦畿萋萋綠林奮榮揚輝魚龍灑

土咸反

灑

士角反

山鳥羣飛駕言出遊日夕忘歸思我良朋如渴

如饑願言不獲愴矣其悲

賦而兼興也近國之地曰畿萋萋盛貌奮發也灑灑
通作囃囃謂衆口呶水而小有聲也此叔夜自敘
其與秀才別後之情言見洪流尚縈帶而相近綠林
且榮輝而悅人魚龍亦共聚而游山鳥有羣飛之樂

是以覽物興懷思得同趣之人相與遊娛以忘晨夕
今乃不獲所願使我思之不已至于悲傷也魏志稱
其文詞壯麗觀此詩亦可見矣

阮籍字嗣宗陳留尉氏人司空記室瑀之子容貌
瓌傑志氣宏放初辟太尉掾及為曹爽叅軍以疾
辭歸高貴鄉公即位徙散騎常侍大將軍司馬昭
欲為其子炎求婚籍乃醉六十日不得言而止後
引為從事中郎籍聞步兵厨多美酒遂求為步兵校

尉縱酒昏酣遺落世事嘗著大人先生傳以譏當
世君子如蝨處禪中又對人能青白眼由是禮法
之士深所讐疾大將軍常保持之景元四年卒

詠懷詩十三首

按晉書籍作詠懷詩八十餘篇文選所錄者
不多李善曰嗣宗身仕亂朝常恐懼謗遇禍
因茲發詠故每有憂生之嗟雖志在刺譏而
文多隱避百代之下難以情測也

夜中不能寐起坐彈鳴琴薄帷鑒明月清風吹我衿孤鴻號外野翔鳥鳴北林徘徊將何見憂思獨傷心

此也此嗣宗憂世道之昏亂無以自適故託言夜半之時起坐而彈琴也所謂薄帷照月已見陰光之盛而清風吹衿則又寒氣之漸也况賢者在外如孤鴻之哀號於野而羣邪阿附權臣亦猶衆鳥回翔而鳴于陰背之林焉是時魏室既衰司馬氏專政故有是喻其氣象如此我之徘徊不寐復將何見邪意謂昏

亂愈久則所見殆有不可言者是以憂思獨深而至
於傷心也

二妃遊江濱逍遙順風翔交甫懷環珮婉孌

力轉反

有芬

芳猗

五臣音於綺反

靡情歡愛千載不相忘傾城迷下蔡容好

去聲

結中腸感激生憂思萱草樹蘭房膏沐為

去聲

誰施其

雨怨朝陽如何金石交一旦更

平聲離傷

賦而比也二妃列仙傳云江妃二女出遊江漢之湄

逢鄭交甫乃解珮珠以贈交甫受而懷之行數十步

女忽不見珮亦隨失婉孌美好貌猗靡謂情意相傾
委也傾城女色之美者李延年歌曰一顧傾人城下
蔡古蔡州其地多荒淫卽鄭國溱洧之間也宋玉登
徒子好色賦云惑陽城迷下蔡感激感念而起情也
萱詩作諼食之可以忘憂膏所以澤髮者沐滌首去
垢也其者冀其將然之詞待雨而見朝日以喻懷其
人而不至也此三語並本詩伯弓篇 初司馬昭以
魏氏託任之重亦自謂能盡忠於國至是專權僭竊

欲行篡逆故嗣宗婉其詞以諷刺之言交甫能念二
妃解珮於一遇之頃猶且情愛猗靡久而不忘佳人
以容好結歡猶能感激思望專心靡它甚而至於憂
且怨如何股肱大臣視同腹心者一旦更變而有乖
背之傷也君臣朋友皆以義合故借金石之交為喻
所謂文多隱避者如此亦不失古人譎諫之義矣須
溪劉會孟謂從二妃來不謂有此結語蓋所謂如截
奔馬者此文詞變化之妙學者亦不可不知也

嘉樹下成蹊東園桃與李秋風吹飛藿零落從此始繁
華有憔悴堂上生荆杞驅馬舍之去去上西山趾一身
不自保何況戀妻子凝霜被野草歲暮亦云已

比也成蹊漢書李廣傳贊云桃李不言下自成蹊荆
杞皆有刺之木所謂荆棘杞棘是也西山首陽也趾
山足也已畢也此言魏室全盛之時則賢才皆願
祿仕其朝譬猶東園桃李春玩其花夏取其實而往
來者衆其下自成蹊也及乎權姦僭竊則賢者退散

亦猶秋風一起而草木零落繁華者於是而憔悴矣
甚至荆杞生於堂上則朝廷所用之人從可知焉當
是時惟脫身遠遁去從夷齊于西山尚恐不能自保
何況戀妻子乎篇末復謂嚴霜被草歲暮云已者蓋
見陰凝愈盛世運垂窮朝廷終將變革無復可延之
理是以情促詞絕不自知其歎息之深也

天馬出西北由來從東道春秋非有託富貴焉常保清
露被臯蘭凝霜霑野草朝為媚少年夕暮成醜老自非

王子晉誰能常美好

興也天馬漢書武帝元狩四年馬生渥洼水中作天馬之歌有天馬來從西極經千里循東道之句凡稱尊貴年齒曰春秋史記所謂富於春秋是也非有託猶言無根蒂也王子晉說見第一卷此嗣宗見世變不常而警夫居勢位享寵祿者之不可久恃也言天馬本出西北而忽來由此東道矣人之壽命本非有託而富貴之在身者豈能常保耶此詩之本旨也

其言清露而凝霜亦以興少年之忽成醜老又謂自非神仙誰能長存此特明夫理之可曉者以證之云爾若夫言外之意自當潛心領會可也

平生少年時輕薄好絃歌西遊咸陽中趙李相經過娛樂未終極白日忽蹉跎驅馬復來歸反顧望三河黃金

百鎰

音溢

盡資用常苦多北臨太行

戶郎反

道失路將如何

比也咸陽漢都長安也趙李顏延年以為漢趙飛燕李夫人者恐無是理劉會孟謂安知非實有此二人

不必求其誰何也蹉跎失足也以喻日落三河謂河
東河內河南嗣宗所居陳留在河南之東故自西而
望緊稱三河也二十四兩為鎰太行失路戰國榮季
梁謂魏王曰臣見人於太行北面而持其駕言欲之
楚臣謂其北面非之楚之路乃曰吾馬良吾用多吾
善御此數者逾善而離楚逾遠此嗣宗自悔其失
身也言少時輕薄而好遊樂朋儕相與未及終極而
白日已暮乃欲驅馬來歸則資費既盡無如之何以

初不自重不審時而從仕服事未幾魏室將亡雖欲
退休而無計故篇末託言太行失路以寓懊歎無窮
之情焉

昔聞東陵瓜近在青門外連畛距阡陌子母相鉤帶五
色曜朝日嘉賓四面會膏火自煎熬多財為患害布衣
可終身寵祿豈足賴

賦也東陵瓜秦有東陵侯邵平者秦既破為布衣種
瓜長安城東瓜有五色甚美因以得名青門漢書所

謂霸城門以其在東故曰青門畛阡陌皆田間道周
禮溝上有畛說文云南北為阡東西為陌距至也子
母言瓜之小大相連帶也 嗣宗知魏亡有日不樂
久仕思得如秦故侯種瓜於青門則志願畢矣故詠
其事以自見既言其瓜蕃美如此不特可資於已又
足以宴會嘉賓焉復言膏火以明自煎人以多財而
致患則以明夫寵祿之易失不若布衣之可以安且
久也按史記世稱東陵瓜從邵平始蓋平所以垂名

者不以侯而以瓜詩云誠不以富亦祇以異其是之謂乎

炎暑惟茲夏三旬將欲移芳樹垂綠葉青雲自逶迤四時更代謝日月遞差

又宜反

馳徘徊空堂上忉忉莫我知

願覩卒歡好

去聲

不見悲別離

比也三旬張銑謂六月一句欲入於秋是也青雲樹葉垂蔭之象遞更迭也差次也忉忉心憂懼也此篇憂魏祚將移於晉故託喻炎暑陽明之時惟在茲

夏今三旬又欲垂盡意謂若至秋冬則涼冷而陰慘
矣且言芳樹之清蔭猶自遠布以見在朝諸臣受魏
恩寵固有不可忘者然觀其勢猶四時之更代日月
之遞馳殆恐終不能遏耳是時衆人惟事奔競誰復
顧慮而我獨於空堂徘徊而憂懼曾莫之知者焉篇
末復謂願見君臣終於歡好不致篡奪而有乖離之
傷其忠愛懇切至於如此不亦悲哉

灼灼西墕

與類同

日餘光照我衣迴風吹四壁寒鳥相因

依周周尚銜羽蛩蛩亦念饑如何當路子磬折忘所歸

豈為

去聲

夸譽名憔悴使心悲寧與燕雀翔不隨黃鵠飛

黃鵠遊四海中路將安歸

重韻

比也墮下墜也周周鳥名韓非子謂其重頭屈尾飲
於河則顛必以一頭銜它鳥羽然後得飲蛩蛩獸名
按孔叢子北方有獸名蛩者常假足於蛩蛩駘驢食
得甘草必嚙以遺之二獸見人來乃負蛩以走爾雅
作叩叩寧願詞也 此篇責羣臣之附司馬氏者而

因以自厲也言魏室雖微尚皆被其恩寵比之日雖
西墮而其餘光猶灼灼然照我也迴風寒鳥以比司
馬僭逼之勢既盛猶有卑下小臣知附王室而不敢
違者且謂周周蛩蛩特禽獸耳亦能饑渴相須患難
相濟如何當朝執政之臣率皆趨附權姦而不顧返
爾豈欲誇大其聲譽而然乎殊不知屈己以媚人其
實憔悴而可悲也末章所謂燕雀即上文寒鳥之屬
黃鵠以指司馬晉公言其志大必將一舉冲天而遊

于四海為今之計寧辭尊而居卑庶幾韜晦以自全
若攀附高遠一遭篡奪之變則我既為魏臣豈忍復
事於晉此所以慮中路之無歸也史稱籍本有濟世
之志朝議以其名高欲尊崇之籍以天下多故名士
少有全者乃求為步兵校尉縱酒昏酣遺落世事大
槩與此詩相合然詩中微意又豈史氏所能悉哉

步出上東門北望首陽岑下有采薇士上有嘉樹林良
辰在河許凝霜霑衣襟寒風振山岡玄雲起重陰鳴鴈

飛南征鵙

或作鴻鵙並通

鵙發哀音素質游

顏延年改作由非是

商聲悽

愴傷我心

賦而比也首陽即雷首山之陽在河中府許猶所也
鵙鵙惡聲之鳥楚詞註云即詩所謂七月鳴鵙者陰
氣至則先鳴而草死素質謂秋天也游者流徧之意
此篇託言出望首陽想夫伯夷叔齊采薇而隱者
得其所矣今我遭此風霜侵迫陰雲擁蔽之時而賢
者避去如鴈之南征讒邪得志如鵙鵙之先鳴者焉

遠近所聞莫非若此則我心之悽傷豈得已哉夫夷
齊之隱當商周革命之際而嗣宗以此興歎意亦遠
矣

北里多奇舞濮上有微音輕薄閒遊子俯仰乍浮沉捷
徑從狹路僂俛趨荒淫焉見王子喬乘雲翔鄧林獨有
延年術可用一作慰吾心

比也北里濮上皆紂都近地按史記紂使師延作新
淫聲北里之舞靡靡之樂正義云武王既伐紂師延

抱樂器投濮水而死後師涓從衛靈公過濮上夜聞
水中樂音因寫之為晉平公奏焉師曠撫之曰此亡
國之音得此必於桑間濮上乎俯仰浮沉趨時附勢
之態乍忽也捷徑取便之私道僂僂猶專力也鄧林
山海經云夸父與日競逐而渴死其杖化為鄧林淮
南子註云今鄧州之西其地多山林者是也言北
里之舞濮上之音皆作於亡國以寓魏國將亡之意
輕薄遊子競趨荒淫以比小人之阿附權姦不知所

止當此之時所見率皆如此豈有若王子喬能超世
絕俗全身遠害者哉然其人已遠其法尚存我雖未
免罹乎世網庶幾託此得以外絕榮利內保天真自
足慰吾心耳厥後嗣宗卒獲令終者以此亦可謂善
處亂世者矣

湛湛長江水上有楓樹林
皋蘭被徑路青驪逝駸駸
遠望令人悲春氣感我心
三楚多秀士朝雲進荒淫
朱華振芬芳高蔡相追尋
一為黃雀哀涕下誰能禁

賦而兼比也湛湛澄澹貌馬純黑為驪駸駸驟也春
氣感心言陽氣發動鳥獸孳尾之時人心不能無感
詩言有女懷春亦此意也以上六句並用楚詞招魂
篇語三楚李周翰曰楚文王都郢昭王都鄂孝平王
都壽春是也朝雲楚襄王夢遇巫山神女宋玉為王
賦其事有朝為行雲等語高蔡亦楚地戰國策楚莊
辛謂襄王曰黃雀鼓翅奮翼自以為與人無爭不知
王孫公子挾彈其下晝遊茂樹夕調酸醎蔡聖
當作靈

侯不以國家為事左抱幼妾右擁嬖女相與馳騁乎
高蔡之中不知子發受命于宣王而以朱絲繫已

按通鑑正元元年魏主芳幸平樂觀大將軍司馬師
以其荒淫無度褻近倡優乃廢為齊王遷之河內羣
臣送者皆為流涕嗣宗此詩其亦哀齊王之廢乎盖
不敢直陳遊幸平樂之事乃借楚地而言夫江水之
上草木春榮其乘青驪馳驟而去使人遠望而悲念
者正以春氣之能動人心也彼三楚固多秀士如宋

玉之流但以朝雲荒淫之事導而進之無有能匡輔
之者是其目前情賞雖如朱華芬芳之可悅至於一
遭禍變則終身悔之將何及哉故以高蔡黃雀之說
終之亦可謂明切矣

懸車在西南羲和將欲傾流光耀四海忽忽至夕冥朝
為咸池暉濛汜受其榮豈知窮達士一死不再生視彼
桃李花誰能久熒熒君子在何許歎息未合并瞻仰景
山松可以慰吾情

比也懸車已見前卷咸池日出處濛汜日入處也
榮明貌景山商所都之山商頌云陟彼景山松柏
丸 此篇因悼世變思以自保之詩言魏之將亡猶
日之將傾也何盛衰若此其速國祚且移於晉矣士
既不幸遭此末運雖視彼一時之富貴不能久存然
未遇賢君能撥亂而反正徒為歎息惟瞻仰高山之
松得以堅貞自持可用慰吾情耳

西方有佳人皎若白日光被服織羅衣左右佩雙璫修

容耀姿美順風振微芳登高眺所思舉袂當朝陽寄顏
雲霄間揮袖凌虛翔飄飄恍惚中流盼顧我傍悅懌未
交接晤言用感傷

賦也西方佳人託言聖賢如西周之王者猶詩言云
誰之思西方美人之意璜佩玉名雙璜者形各半規
在衝牙之兩旁晤對也 此嗣宗思見賢聖之君而
不可得中心切至若有其人於雲霄間恍惚顧盼而
未獲際遇故特為之感傷焉 演義以嵇阮詩係於

魏或者非之蓋見世稱竹林七賢名在晉史故爾然
考二人之立心殆與陶靖節畧同史言康娶魏宗室
女拜中散大夫及山濤舉為吏部荅書拒絕終無仕
晉之意籍當高貴鄉公時仕為常侍知司馬氏欲求
昏以意却之復縱酒昏酣詠詩以見志且康被譖誅
籍以壽終並在景元年中自與建安諸子委身曹氏
者不類今特依演義列於魏詩之後或又言籍不當
為鄭冲作勸晉王牋然攷其文大槩謂褒德賞功

禮典之常不必固讓之意演義論步兵心乎王室有
同淵明勸進之文醉不欲為而強迫為之非揚雄甘
為美新者比但惜其不能一死而曲自免不得為全
美耳讀者亦不可不知也因附其說於此云

晉詩一

張華字茂先范陽人強記洽聞撰博物志晉武帝
受禪以為黃門侍郎贊伐吳有功封廣武侯遷尚
書荀勗譖之出都督幽州惠帝即位拜太子少傅

為太尉楊駿所忌不與朝政及進為侍中中書監
遂盡忠匡輔加右光祿大夫封壯武郡公元康六
年拜為司空與趙王倫孫秀有隙永康初少子驥
以中台星坼勸父遜位乃曰天道玄遠惟修德以
應耳不聽卒為倫秀所害

勵志

四言九章

大儀幹

鳥枯反

運天迴地游四氣鱗次寒暑環周星火既

夕忽焉素秋涼風振落熠燿宵流

賦也大儀陰陽也易云太極生兩儀是也幹轉也天
迴天繞地左旋日夜一周也地游李善引河圖地有
四游之說謂四時升降不止也星火心星大火也夕
以其七月西流漸下而昏也熠燿螢也見王氏本草
流飛行貌 茂先志欲及時進德修業故賦此詩以
自勵而併以勉人首言天運周迴星氣流易忽焉至
此素秋則草木搖落而變衰螢亦化生而宵流矣言
此以起下章之思感也

古士思秋寔感物化日與月與

平聲

往苒代謝逝者如斯

曾無日夜嗟爾庶士胡寧自舍

去聲

賦也古士猶言君子思猶悲也淮南子曰春女思秋
士悲而知物化矣寔與實同與語詞往苒猶侵尋也
逝者如斯即論語子在川上之詞胡寧皆何也舍止
也此承上章而兼言天運不已日月寒暑之往來
萬物變化而不窮皆與道為體運乎晝夜未嘗已者
如此嗟爾衆士固當因時感念以自強不息何可以

自止哉

仁道不遐德輶如羽求焉斯至衆鮮克舉大猷玄漠將
抽厥緒先民有作貽我高矩

賦也仁者心之德也遐遠輶輕也猷道也玄微妙漠
廣大也抽引繹也緒端也先民謂古之聖賢矩所以
為方之法也 此言仁道在人為甚近求焉而無不
至德之在人為甚輕但衆人少有能舉之者蓋道之
本體玄漠未易窺測然其端緒發見則有如惻隱羞

惡辭讓是非者焉且將抽繹而擴充之則道雖云大
而為之在我不難矣此蓋已有先覺者出而遺我以
至高之法如此也

雖有淑姿放心縱逸出般音盤于游居多暇日如彼梓材
弗勤丹漆雖勞樸斲終負素質

賦也梓良材可為器者樸斲既成質而未治精也

言人雖有美質惟自放心遊惰不敏于學安望德業
之有成如彼梓材之良雖勞樸斲而弗加丹漆終不

能成堅美之器以適於用也

養由矯矢獸號于林蒲盧縈繳

職畧反

神感飛禽末伎之

妙動物應心研精耽道安有幽深

賦也養由姓養名由基楚大夫善射者也矯揉直也

淮南子曰楚王有白鰲王自射之則搏矢而熙使由

基射之始調弓矯矢則鰲擁柱號矣蒲盧當作蒲且

音沮淮南子註亦云楚人縈繳以生絲繫矢而射所謂

弋也汲冢書云蒲且子見雙鳬過之射中其一其不

被弋者亦隨而下研窮也耽謂好之深而學之篤也
言由基蒲且之射小藝也以其專心篤學至於精
熟則其動物應心之妙有不期而然者矣士之為道
苟能潛心積慮優游饜飫於其間至於默識心融豁
然貫通又安有幽深而不至者哉

安心恬蕩棲志浮雲體之以質彪之以文如彼南畝力

耒既勤蓀

音鍵

蓀

音蓀

致功必有豐殷

賦也恬淡靜蕩寬廣也棲猶處也浮雲以喻高遠體

猶本也彪文貌耒手耕曲木芸草曰蘆壅苗曰蓰殷
盛也 承上章而言為學之序有不可缺者苟能安
心恬蕩而不失所養棲志浮雲而不溺於卑近則其
進修自不能已必也至於文質彬彬然後可為成德
也復以農功為喻其丁寧之意切矣

水積成川載瀾載清土積成山敲蒸鬱冥山不讓塵川

不辭盈勉爾

一作志

含弘以隆德聲

比也大波曰瀾敲蒸氣上出也鬱冥蒙勃之貌含包

容弘寬大也隆亦大也 此亦承上章言為學當日
進而不已也水積而後成川土積而後成山以比人
之積學而後成德然山既成而不讓塵之益增川既
成而不辭水之益滿人既畜學以成德又當勉其含
弘之量以光大其德聲也易大畜之象云君子多識
前言往行以畜其德而彖傳亦云篤實輝光日新其
德既畜矣而又日新焉此所以為畜之大此章其得
大畜之旨者歟

高以下基洪由纖起川廣自源成人在始累

魯水反

微以

著乃物之理纒牽之長實累

力偽反

千里

賦也土積之始曰基水所從出曰源纒兩股索牽繫而挽之也戰國策段干越人謂新城君曰千里之馬不能取千里者纒牽長也纒牽於事萬分之一而難千里之行此特申言上章積累之意而又戒以當謹於始不可小有牽尼而為遠大之累

復禮終朝天下歸仁若金受礪若泥在鈞進德修業暉

當依易
作輝

光日新隰朋仰慕予亦何人

賦也復禮歸仁語本論語言其効甚速而至大也礪
磨石也金就礪則利鈞陶家制器之具模下圓轉者
是也隰朋齊大夫姓名莊子稱其愧不若黃帝舊註
又言其常慕管仲之德 此末章言能實用其力則
德業照著有不難者且舉隰朋之仰慕聖賢而益以
自勉也 愚謂漢魏以下諸詩未有如茂先此篇能
以聖賢之學自勵其志者且逝者如斯一語程子謂

自漢以來儒者皆不識此義今茂先獨得聖人之旨
則其知識超詣有非淺學之士可得而儗者焉厥後
茂先負台輔之望立朝盡忠臨危不屈而信史以令
德稱之豈非力學之驗歟

雜詩

晷度隨天運四時互相承東壁正昏中固陰寒節升
繁霜降當夕悲風中夜興朱火青無光蘭膏坐自凝重
衾無暖氣挾纊如懷冰伏枕終遙昔寤言莫子應

叶平聲

永思慮崇替慨然獨拊膺

比也晷日景度周天之躔度也東壁星名月令云仲冬之月日昏東壁中固堅凝之謂升進也朱火謂燈也蘭膏以蘭香煉膏也不知所致曰坐挾亦懷也續細綿也應荅語也崇替猶言興廢拊膺謂無所申其憤恨而自擗其胷也此茂先見魏之將亡而感歎之歟其意謂世運固有遷易乃借四時為喻而言仲冬陰盛既極正天道變革陽氣復生之時方且繁霜

悲風交相侵迫而朱火為之無光則君之昏弱從可知焉于時忍寒伏枕以終長夜亦惟安時處順以待陽明之來竟無可與語此者矣但永思其興廢之故則亦不能不慨然而拊膺也

答何劭

吏道何其迫窘然坐自拘縷縷

如追反

為徽纆文憲焉可

踰恬曠苦不足煩促每有餘良朋貽新詩示我以遊娛

穆如灑清風奐若春華

音花

敷自昔同寮寗

音菜

於今比

毗至

反園廬衰疾近辱殆庶幾並懸輿散上聲髮重陰下抱杖

臨清渠屬耳聽鶯鳴流目翫儵

直由反

魚從

七容反

容養餘

日取樂於桑榆

賦也吏道呂向曰理人之道也窘囚拘之貌冠系曰
纓其結餘下垂者曰綏徽三股索憲法也曠寬泰也
穆清美也貞粲爛貌同官為寮同地為寮比近也辱
殆語出老子書知足不辱知止不殆懸輿歸老之事
漢薛廣德乞骸骨以歸懸其所賜安車傳之子孫儵

魚名也 何敬祖嘗以茂先所居隣並乃贈以詩願
逍遙共適以偕黃髮故茂先以此答之因自述其居
官迫於煩冗衰疾近於辱殆亦庶幾相與佚樂云爾
然既盡忠所事有志弗遂惜哉

情詩

遊目四野外逍遙獨延佇
蘭蕙緣清渠繁華陰綠渚
佳人不在茲取此欲誰與
巢居知風寒穴處識陰雨
不魯遠別離安知慕儔侶

賦也延佇有所待而久立也與猶贈也巢居知風穴
處知雨語出漢翼奉傳如鵲知來歲多風則巢於下
枝天將陰雨蟻先出垤之類呂向謂蟲鳥久處巢穴
性所習知也 此或茂先在外時代述其室家之詞
歟

司馬彪字紹統高陽王睦之長子少以薄行不得
為嗣出後宣帝為政由此不交人事專精學業注
莊子作九州春秋又以漢中興無良史撰續漢書

武帝泰始中為祕書郎轉祕書丞後拜散騎侍郎

贈山濤

山濤字巨源河內人初為吏部郎武帝受禪
除吏部尚書及遷僕射侍中仍領吏部後拜
司徒

茗茗椅桐樹寄生於南嶽

叶虞欲反

上凌青雲霓下臨千仞

谷處身孤且危於何託余足昔也植朝陽傾枝俟鸞鷟

角食

反叶士促反

今者絕世用空

音空

憊

音總又音綜

見迫東班匠不我

碩牙曠不我錄焉得成瑟瑟何由揚妙曲冉冉三光馳
逝者一何速中夜不能寐撫劒起躑躅感彼孔聖歎哀
此年命促

此二句意冗氣衰又非知道者之言合刪去使上下語脉自然相貫

卞和潛幽

冥誰能證奇璞

叶普木反

冀願神龍來揚光以見燭

比也苔苔高貌椅桐陸璣草木疏云梓實桐皮曰椅
陶弘景曰白桐一名椅桐可作琴瑟霓虹也山之東
曰朝陽凡桐材以孤生向日者為貴鸞鸞鸞鳳屬也
鸞鳳非梧桐不棲倥傯窮困也班與般同公輸子之

名匠即莊子所稱匠石見櫟社樹而不顧者牙伯牙
善鼓琴曠師曠晉樂師也錄采記也冉冉猶言漸漸
石中有玉曰璞神龍山海經云赤水之山有神而人
面蛇身其視能燭九陰是謂燭龍 初紹統未仕時
山濤居選職故贈是詩所以自薦達也其意謂抱負
良材傾俟世用今者不見顧錄則所蘊無由表著將
恐歲不我與遂沒世而名不稱是以中夜不寐撫劍
躑躅殆有皇皇如也之意焉且濤為吏部凡所甄拔

人物各為題目時稱山公啓事故又言世無卞和則雖有珎璞無能識者惟神龍之明照無所不至所以深有望於巨源也

何劭字敬祖陳國陽夏人司空魯之子武帝踐阼以為散騎常侍遷侍中尚書惠帝即位拜太子太師累遷尚書左僕射永康初遷司徒趙王倫篡位以為太宰永寧元年薨襲封朗陵郡公謚曰康

贈張華

四時更代謝懸象迭卷舒暮春忽復來和風與節俱俯
臨清泉涌仰觀嘉木敷周旋我陋圃西瞻廣武廬既貴
不忘儉處有能存無鎮俗在簡約樹塞馬足攀在昔同
班司今者並園墟私願偕黃髮逍遙綜琴書舉爵茂陰
下攜手共躊躇奚用遺形骸忘筌在得魚

賦也卷舒謂日月出沒也周旋行周匝也陋隘狹也
廣武茂先舊封邑名今因以稱其廬有無李善引毛
氏詩註有謂富無謂貧此言處富而能儉如居貧時

也鎮者撫而化之之謂簡不煩也約亦儉也樹塞管仲偕奢之事見論語摹法也同班司按晉書劭為太子太師時華為太傅大丘曰墟綜猶理也 史言何曾窮奢極侈日食萬錢而劭亦有父風然其優游自足不貪權勢故此詩能稱慕茂先之儉德而布其私願者如此且言何用遺忘形骸但自相得意如得魚忘筌可也而茂先答章亦云庶幾懸輿蓋二人之志未即歸隱於此可見

以下四葉原書魚尾下書名訛誤

傳玄字休奕北地人性剛勁亮直州舉秀才除郎
中武帝即位初置諫官以玄為之俄遷侍中轉司
隸校尉每奏劾無所容貴游震懾臺閣生風封清
泉侯卒謚曰剛

雜詩

志士惜日短愁人知夜長攝衣步前庭仰觀南鴈翔玄
景隨形運流響歸空房清風何飄飄微月出西方繁星
依五臣作衣音去聲青天列宿息救反自成行蟬鳴高樹間野鳥

號東廂纖雲時髣髴渥露霑我裳良時無停景北斗忽
低昂常恐寒節至凝氣結為霜落葉隨風摧一絕如流
光

賦而比也景謂鴈影廂廡也凡正寢東西夾室皆曰
廂髣髴似有似無之貌渥猶濃也低昂迴轉傾側之
勢流光即上文無停景之謂此休矣傷魏祚之日
慮慮讒邪之傾危因物感懷而作歎其言觀南鴈之
翔則知其能避寒就暖而人之審時擇處亦當如是

于時魏主昏弱不久淪沒正猶微月之西出晉王設
官分職而羣臣莫不依附亦猶繁星麗天而列宿成
行也其間亦有讒佞小人如蟬鳴鳥號者焉雖其出
沒詭秘若織雲之髣髴而浸潤之迹已如渥露之濡
衣矣殆恐時移事變陰凝堅沍君子亦將不能保身
如落葉之摧絕也其詞雖若繁複而意實深密讀者
詳之

王讚字正長義陽人博學有俊才辟司空掾官至

散騎侍郎

雜詩

朔風動秋草邊馬有歸心胡寧久分析靡靡忽至今王
事離我志殊隔過商參昔往鷓鴣鳴今來蟋蟀吟人情
懷舊鄉客鳥思故林

五臣本
多誤

師洵久不奏誰能宣我心

賦也靡靡猶遲遲也王事王命使為之事離與罹同
猶繫也殊別也鷓鴣黃鸝也師洵衛靈公時樂師奏
者謂調音樂使有節奏也正長因行役思歸而作

此詩言朔風既動秋草則邊馬且有歸心而我何為
久離家室至今不得歸耶蓋以王事繫于我心不敢
不勤是以自春至秋殊隔逾遠且人物各有思舊之
情世無師洎誰能為我宣明此心也詳此則我獨賢
勞之意亦可見矣

孫楚字子荆太原人少負才氣多所陵傲年四十
餘始出仕及為石苞驃騎叅軍初至長揖曰天子
命我叅卿軍事因此構隙遂湮廢積年後扶風王

駿以舊好起為征西叅軍遷衛軍司馬惠帝初拜
馮翊太守卒

征西官屬送於陟陽候作

陟陽地名候斥候也

晨風飄岐路零雨被秋草傾城遠追送餞我千里道三
命皆有極咄嗟安可保莫大於殤子彭聃猶為夭吉凶
如糾纒憂喜相紛擾天地為我鑪萬物一何小達人垂
大觀誠此若不早乖離即長衢惆悵盈懷抱孰能察其

心鑒之以蒼昊齊契在今朝守之與偕老

賦也三命謂上壽中壽下壽也鄭玄禮記註云司命主督察三命莫大云者莊子曰莫大於秋毫之末而泰山為小莫壽於殤子而彭祖為天此借用其語而意則不同未成人而死者謂之殤彭彭祖商賢大夫列仙傳謂其歷虞夏至商壽八百歲聃老聃李耳字伯陽謚曰聃或言其二百餘歲後之流沙莫知所終糾紱也紛擾互起貌鑪冶鑄之器垂謂據高而視下

也誠者警敕之詞齊一契合也

子荆自征西幕下遠

赴馮翊而同寮官屬傾城出餞故賦此詩以為別因
言人生修短皆有定極安得保其長存以言乎天則
固莫大於殤子矣以言乎壽則雖如彭聃比之天地
猶以為天也奈何吉凶憂喜交相纏擾鮮有不為滑
其精魂而損其自然之數者惟達人大觀能知造化
之機所以齊生死輕去就不為外物之所動搖顧我
苦不早誠於此當此乖別未免惆悵盈懷也然揆之

初心本慕此道惟天鑒之當與天地間萬有不齊者契合為一自今日始守之終身而不失矣篇中語多見賈誼服賦亦皆莊周之遺意而子荆乃借此以自廣耳固未必能究夫原始反終之理而真有得焉然世之鄙夫汲汲以死生得失為患者觀此亦庶幾能警悟云

左思字太冲齊國臨淄人貌寢口訥而詞藻壯麗造齊都賦一年乃成復欲賦三都遂構思十年門

庭藩溷皆著筆紙遇得一句即疏之復以所見不
博求為祕書郎及賦成時人競相傳寫洛陽為之
紙貴齊王問命為記室督辭不就終於家

詠史七首

弱冠弄柔翰卓犖

音洛

觀羣書著論准過秦作賦擬子虛

邊城苦鳴鏑羽檄飛京都雖非甲冑士疇昔覽穰苴

余子

反長嘯激清風志若無東吳鈎刀貴一割夢想騁良圖

左眄澄江湘右盼

反匹覓

定羗胡功成不受爵長揖歸田

廬

賦也人年二十曰弱冠柔翰筆也卓犖超絕之意准
亦擬也賈誼有過秦論司馬相如有子虛賦羽檄徵
兵之書說文云木簡長尺二寸為檄魏武帝奏事云
若有急則挿鷄羽於檄言如羽之疾也曹兕登也疇
曩也穰苴姓田氏善用兵齊景公尊為大司馬因號
曰司馬穰苴兵法鈐刀謂以鈐為刀但可充一割耳
班超上疏云臣冀効鈐刀一割之用圖謀畫也眊邪

視盼流目也羗胡西戎也 此太冲因詠史以述已
志之詞是時蜀既亡而吳未平故特氣吞東吳而併
及西羗也至於功成不取長楫歸田其節槩如此可
尚矣夫

鬱鬱澗底松離離山上苗以彼徑寸莖蔭此百尺條世
由躡高位英俊沉下僚地勢使之然由來非一朝金張

藉

音席

舊業七葉珥

仍吏反

漢貂馮公豈不偉白首不見招

興也離離纖跣之貌胄裔也躡登也僚賤稱左氏傳

云隸臣僚金張漢書金日磾及弟倫後嗣自武帝至平帝七世內侍又張湯子孫相繼為侍中中常侍者凡十餘人二家貴寵比於外戚藉猶賴也葉世也珥挿也漢貂董巴與服志云侍中常侍冠武弁貂尾為飭馮公名唐文帝時為郎中署長至武帝求賢良舉唐時年九十餘不能就偉奇特也 此篇借以刺朝廷任人不得其當豈亦傷已之不見用歟

吾希段干木偃息藩魏君吾慕魯仲連談笑却秦軍當

世貴不羈遭難

去聲

能解紛功成恥受賞高節卓不羣臨

組不肖縲

私列反

對珪寧

一作不

肖分連璽耀前庭比之猶

浮雲

賦也希亦慕也段干木魏人文侯師之過其間必軾
諸侯聞之而畏魏班固幽通賦云干木偃息以藩魏
謂為魏之藩屏也魯仲連齊人奇偉倜儻游於趙會
秦將白起圍邯鄲魏將新垣衍亦來說趙尊秦為帝
仲連謂平原君曰梁客安在吾請為君責而歸之及

見與語而行再拜請出秦將聞之為却五十里平原
君欲封之復以千金為壽仲連笑曰所貴於天下之
士者為人排難解紛而不取也遂辭去不羈謂不受
人之羈絡也紛亂也卓特立貌組綬縹繫也連璽謂
如蘇秦佩六國印之類 劉良曰此述干木仲連潔
已利物以刺當世之無功而貪爵祿者也

濟濟京城內赫赫王侯居冠蓋陰四術朱輪竟長衢朝
集金張館暮宿許史廬南隣擊鍾磬北里吹笙竽寂寂

揚子宅門無卿相興寥寥空宇內所講在玄虛言論准
宣尼詞賦擬相如悠悠百世後英名擅八區

賦也濟濟赫赫皆盛貌冠蓋貴者出必擁蓋所以覆
冠故以為名術邑中道也竟猶徧也許史並漢外戚
之家孝宣許皇后父廣漢封平恩侯史良娣亦宣帝
祖母也其兄子高為車騎將軍領尚書事封樂陵侯
笙等皆匏屬笙十三簧等三十六簧揚子名雄字子
雲蜀郡成都人家素貧人希至其門草太玄以自守

玄虛即太玄也雄又譌法言象論語每作賦擬司馬
相如以為式擅專也八區八方也此言漢京城之
內王侯極其貴盛時人多趨附之惟揚子窮居寂寥
修業以自娛然而名傳百世則在此而不在彼其亦
警當代權貴者歟

皓天舒白日靈景耀神州列宅紫宮裏飛宇若雲浮
我高門內藹藹皆王侯自非攀龍客何為歟讀如忽來遊
被褐出閭闔高步追許由振衣千仞岡濯足萬里流

賦也舒者開明之意靈景日光也神州王嬰古今通
論云崑崙東南方五千里謂之神州帝王之宅也紫
宮星垣名一曰紫微喻皇都也攀龍言趨附也揚雄
法言云攀龍鱗附鳳翼闔闔洛陽門名許由堯時逸
士隱於箕山者也太冲因見高門氣勢之盛士風
奔競日甚慨然念許由之逸迹而追蹈之且欲振衣
濯足於高遠之地以去其塵雜者如此其不肯事齊
王問也宜矣

荆軻飲燕市酒酣氣益震

平聲一作振

哀歌和

去聲

漸離謂若

傍無人雖無壯士節與世亦殊倫高盼邈四海豪右何足陳貴者雖自貴視之若埃塵賤者雖自賤重之若千鈞

賦也荆軻燕刺客也與高漸離及狗屠飲於燕市酒酣漸離擊筑軻和而歌以相樂已而相泣傍若無人後為燕太子丹報仇為秦所殺倫比也邈輕視貌豪右尊貴之稱賤者謂有德而無位者也三十斤為鈞

荆軻匹夫之勇本無足取特以其能邈視四海輕
勢位而重有德故太冲借以諷當代小人之在高位
者爾

習習籠中鳥舉翮觸四隅落落窮巷士抱影守空廬出
門無通路枳棘塞中塗計策棄不收塊若枯池魚外望
無寸祿內顧無丰儲親戚還相蔑朋友日夜踈蘇秦北
遊說輸芮反李斯西上書俛仰生榮華咄嗟復凋枯飲河
期滿腹貴足不願餘巢林栖一枝可為達士模

興而比也習習數飛也落落不相入也後漢書云耿
弇落落難合塊困處貌寸祿猶國語叔向言尋尺之
祿也蔑輕視也蘇秦辯士也說六國為從約長并相
六國後為齊宣王客卿齊大夫與之爭寵使刺殺之
李斯亦以善說為秦客卿始皇以為丞相後二世因
趙高譖下斯就刑咄嗟謂一呼語之頃飲河巢林莊
子曰鷦鷯巢林不過一枝偃鼠飲河不過滿腹太
冲有志之士與世不合惟窮居以自守正猶鳥在籠

中舉翮有觸者也故以起興且言枳棘塞塗以比小人布滿朝行賢路為之不通是則雖有抱負無所展施以致困處窮賤親友踈蔑也然而終安素分不肖妄求以取危禍故舉蘇秦李斯之徒以自警復借飲河巢林之喻以自勉云

招隱二首

按淮南小山招隱士篇謂深山窮谷非君子所宜處而欲招其來歸今晉人乃以招尋為

義欲就與之俱隱而所謂招來者王康琚則
以為反招其名題前後不同如此

杖

去聲

策招隱士荒塗橫古今巖穴無結構丘中有鳴琴

白雪停陰岡丹葩耀陽林石泉漱瓊瑤纖鱗或浮沉非
必絲與竹山水有清音何事待嘯歌灌木自悲吟秋菊
兼餽糧幽蘭間

去聲

重

平聲

襟躊躇足力煩聊欲投吾簪

賦也杖倚策杖也丘中謂壤室也尚書大傳子夏曰
弟子受書於夫子者雖退而岩居作壤室向彈琴其

中以歌先王之風瓊瑤美玉石泉之色似之灌叢也兼
猶當也餽乾食也間雜也襟衣之交衽楚詞云夕食
秋菊之落英又云紉秋蘭以為佩躊躇猶豫也太
冲厭世溷濁素有箕山之志故此詩託言招尋隱士
於巖林之間見其境趣幽雅人事簡易方且躊躇顧
慮足力煩倦欲棄冠簪而就隱也

經始東山廬果下自成榛前有寒泉井聊可瑩心神峭

梢一作

舊青蔥間竹柏得其真弱華棲霜雪飛榮流餘津

爵服無常玩好惡

並去聲

有屈伸結綬生纒牽彈冠去

上聲

埃塵惠連非吾屈首陽非吾仁相與觀所尚逍遙極

李善

作撰
非是

良辰

賦也經始謂初營度也叢林曰榛峭蒨青葱並鮮榮
貌真猶貞也孫卿子曰桃李菑繁於一時時至而後
殺松柏經隆冬蒙霜雪而不凋可謂得其真矣弱垂
貌綬佩印之組纒牽已見張茂先詩惠連柳下惠少
連也首陽指伯夷叔齊而言尚高尚也 按王隱晉

書謂太冲徙居洛陽城東著經始東山廬之詩乃知
此篇隱居以後所作故言目前所有自可賞適靜觀
物理有契吾心當此悖亂之時爵服豈得常玩而專
以好惡為屈伸觀夫結綬而仕自生纏牽之累不若
彈冠隱去以自潔也且如惠連之降志辱身豈非吾
之屈乎夷齊餓於首陽豈非求仁而得仁者乎是以
人當各觀志之所尚逍遙遊宴以盡夫良辰而已

雜詩

秋風何冽冽白露為朝霜柔條旦夕勁綠葉日夜黃明月出雲崖皦皦流素光披軒臨前庭嗷嗷晨鴈翔高志局四海塊然守空堂壯齒不恒居

或作若

歲暮常慨慷

賦而比也崖際也皦皦明貌嗷嗷哀鳴也局狹之也齒年也慨慷感傷之意此篇首言天氣漸變而寒凝草木亦因時而變衰矣觀此則人之少壯者安得不速老耶又言雲際之月出流素光而我開軒視之乃有哀鴈飛翔而去者以喻陰邪之臣當朝專政是

使賢者方高舉而遐遁也於斯時也我既不可以仕
則平生高志阨而不申將恐壯年一去老死無聞故
常於此風霜搖落之時而為之感傷焉是知太冲不
肯就仕者豈其心哉亦必有道矣

張翰字季鷹吳郡人有清才縱任不拘時人號為
江東步兵齊王問辟為東曹掾翰知問必敗乃因
秋風起思吳中菰菜羹鱸魚膾遂命駕而歸嘗
荅人曰使我有身後名不如即時一盃酒其曠達

類如此

雜詩

暮春和氣應白日照園林青條若總翠黃華如散金嘉

卉亮有觀

去聲

碩此難久耽

叶持林反

延頸無良塗頓足託幽

深榮與壯俱去賤與老相尋歡樂不照顏慘愴發謳吟
謳吟何嗟及古人可慰心

賦而兼興也總聚東也卉草之總名凡物有可觀者
謂之觀耽樂也良塗猶言亨衢頓駐也此季鷹退

歸後詠懷之詩言暮春景物鮮榮信有可觀但易至
衰謝未足耽玩亦以興人之榮貴與少壯皆不可以
久恃蓋我初企望而進既無可騁之塗於是歛迹以
退而又困悴如此則亦無如之何唯念古人有能處
此而無憂者可用慰吾心焉若季鷹亦可謂善自處
者矣

風雅翼卷三